

太上七星神呪經

黃老元帝於上清玉洞紫宸金闕壹問天老曰下界人民灾禍之由起乎何也天老曰昔混沌未分元化體一天地設位乃見五行巡歷天下察無道之國觀不祥之人凡處虛域之內蠢動含生命係於天星辰凌犯彗孛衝破遂生兵灾水旱流移知而逃形可全自己逆之遇害凶釁迭生黎民死亡淪沈苦海元帝曰民之所苦吾豈忍之何以救拔免遭厄難天老帝君念七星神呪禹步微言每日面東七徧可以上消天灾下散地禍妖邪蠱魅魁毒精自消攝伏遠行避路不敢損害道人能除錯謬之氣續廢竭之年凡百灾殃隨呪即滅汝須秘藏金櫃慎勿流傳授非其人天降刑書即說呪曰

日出東方 赫赫大光 靈神衛我
慶門立章 標存拱惠 不雲炳剛
把持既濟 標攝大匡 未越絕命
故水鬼鄉 三元滿體 八神作彊
逆吾者死 敢有衝雷 黃老律令

急難遠方 北神統錄 水斷不祥
急急如律令

太上七星神呪經



太上虛皇保生神呪經
太上虛皇開散玉庭金房是睪羣喜壽真我設三道滅鬼生靈我能無死亦能無生長生在迴老返嬰竟鬼受鍊五神安寧迴厥車輪北謁玉清升入太無與日合明遂成真人五帝合并三元所告萬神咸聽洞玄三昧無量真靈羣仙侍衛名列玉清洞真玉虛無中之無道中之道神化須臾洞神靈應法象有為驅邪滅惡運轉璇璣東方保生青童神靈正一守竟克保昌齡南方保生固氣赤靈萬神無越使我長寧西方保生侍寗白靈辟除妖氣令我利亨北方保生通利元精五氣真符使臣長榮中央保生主我身形飛行自在天地齊并遊觀太虛上朝玉京下祛妖魅福惠羣生

太上虛皇保生神呪經